

## GUITS NE BEY LO GRË

# ZHA ISRAEL

---

**1** Padzeela, ndal vult bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. <sup>2</sup>Sangue niina, Xpëedpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuane no, ni men ne bzo me gnabeya grësew.

<sup>3</sup>Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuane no, ni por xtiidz me laaw quiayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zaatne riegual me ne nac me men ne rnabey.

<sup>4</sup>Ga rlu ganle men nroob nac Jesús, led lega lëd me Xpëed Dios; men nroob nac me lo grë anjl. <sup>5</sup>Ni tib lo anjl bneed Dios zigne bnee me lo Jesús, zeene rëb me: “Xpëed naa nac luu. Desde nadze laa zho gunbey ne Xpëed naa nac luu.” Stib vult zeene bzeet me Jesús, rëb me: “Xpëed naa nac me, naa nac Pxoze me.” <sup>6</sup>Ni zeene biaad Jesús lo guidzliu; men ne nac Xpëedpaa me ga, rëb me: “Grëse xanjl naa, none yquitsgzhib zho lo me.”

<sup>7</sup>Zaatne raquiet anjl, rneew:

Tib mandadse nac zho lo Dios,  
pale zigne rzhoon me sca rzhoon zho rie zho zaatne rnabey me zho;  
me rnabey rlu zho zigne rlu bel.

<sup>8</sup>Sangue zaatne raquiet Xpëed me, rneew:

Dios, luu nac men ne zobnabey,  
ni gdzind dze ne grie luu;  
zeene run luu guielwxtis, zigne rieguala sca run luuw.

<sup>9</sup>Ni palal rdziguiend luu grë guielntseeb,  
niapse ncuane ndzinli, ncuane nonguiel, min co rleynie luu;  
min co gane bzooblo Dios luu, nac luu men ne rnabey,  
luu nac men ne mazdraa nroob guielbley gbaa.

<sup>10</sup>Laa stib lugar rnee:

Men rnabey nac luu, luu bzaa guidzliu, luu bzaa gbaa dib nacsew.

<sup>11</sup>Nli dzdiz dze nitlo grë ncuane co, grësew zlozha zigne riozh grë lar,

<sup>12</sup> dzigo laa luu ctibèda, zig rdibèd grè lar, laa luu cuee stib min cub;  
zigne run zha ne rtsëëxab.

Sangue luu, tibaque nac luu,  
nacd luu men ne nitlo, nacd luu men ne lozh xquielmban.

<sup>13</sup> Haxta rëb Dios lo me:

Cue naa nëz derech, nu bzob,  
nieeda lozh gnaz naa zha ne rlëë lo luu, csañ naa zho lадznia luu.

Nligaa men nroob nac me lo grè anjl, sac ni tib lo anjl bneescad Dios. <sup>14</sup> Lo me ga sca bnee Dios, sac gon grè anjl, mese nac zho run zho dziin lo Dios, rxeeł me zho rquianap zho zha ne nacle diidz laa lo grëtaa guielnë ne csaab me.

**2** Gacxe nagon waa, gotsaa guien ne ganle ib none dzioxco ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne.

<sup>2</sup> Sac gon, niicle zeene xanjlse Dios biadteed xtiidz me lo miech padzeela, ni goconona; grëse zha ne güeynalda, pteed Dios zho caxtigw ne riegual zho. <sup>3</sup> ¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew; <sup>4</sup> niicle Diosgaa, blactaa grë ncuaane quialu me, blactaa grë milagr ne run me, rlu me ganle ne nli diidzli biadseed zho ne; ni zhaagaa grë guielbiini ne ral zdoo me rdeed Espiritu Sant lo grè zha ne dib zdoo rnalo Jesús.

### Jesús nac men ne grieelo gdziñnie miech lo Dios

<sup>5</sup> Zig nac lo guidzliu cub ne ndion ne naraa gneedz Dios, psand me ne anjl gnabey low. <sup>6</sup> Lo Xtiidz me zhobnee ganle zeene znu rëb David lo me:

¿Cho nac miech ne squitaa noxco luu zho?

Zig nac tib men qui, ¿pe nacne squitaa runnon luu me?

<sup>7</sup> Tib blase dze psanwin luu me palal lo grè anjl; na laa luu psanglaa me stib, beennon luu me, bzo luu me mele gnabey.

<sup>8</sup> Grëtaa ncuaane no, laa luu psana ladznia me.

Nli gard gac grè mine bnee David ga, <sup>9</sup> per ndionle ne ganle zha psanwin Dios Jesús lo grè anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtól ne.

<sup>10</sup> Ible sca gocladz Dios, men nroob ne bzaa grëtaa ncuaane no, ible me bdeed diidz scataa grè guielnë ne gon Jesús; gane niina, Jesússe nac men ne grieelo ner lo grëtaa miech guizhiu ne no ygab lo me, gdziñnie Jesús zho lo guielndzon ne no me.

<sup>11</sup> Grëse ne ne nac ne zha ne psanmbe Jesús ngab ne lo Dios, yele ne nac mëed lo Dios. Gacxe waa, rley Jesús rnee me bets me nac ne; <sup>12</sup> no tib lugar lo Xtiidz Dios zaatne raquiet zeene znu rëb me:

Zne naa lo grè bets naa, gacnañ zho ganle cho nac luu;  
ni zeene ycaalsa zho grè zho, tipse dzioolnie no luu.

<sup>13</sup>Stib vüelt rëb me:

Dios nac men ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

<sup>14</sup>Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque ladznia ma no miech par gnitlo ma zho. <sup>15</sup>Sca psilaa me grë miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

<sup>16</sup>Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios.

<sup>17</sup>Gacxe waa, goc me zig nac miech, zigne nac ne ne nac ne bets me; ni parne scagaa grieelo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne; <sup>18</sup>nroob nac grë guielnë ne bded me, pquiana mendox nquuil ma me niab me lo dol. Ni ne mezhal bded grë min co, nanpaa me zha rzac zha ne nodeda, gane ible zacnien me zho.

### Gunndipde to zdoo to

**3** Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

<sup>2</sup>Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grë zha Israel. <sup>3</sup>Per Jesús nac men ne non, sac gon lo me ngab grë miech co, laa Moisés loxaque pquianap me zho.

<sup>4</sup>Zig nac zha ne rzhixcuua tib yu, nli non zho, per mazdraa non men ne bzaa grëtaa ncuane no; ni lëe men co nac Dios. <sup>5</sup>Nli bin Moisés diidz been me xtsiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho. <sup>6</sup>Sangue Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque ine nley gac ne dib zdoo ne yquiambiaaz ne gac grë mine nacle diidz gneedz me lo ne.

<sup>7</sup>Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espíritu Sant lo ne, rnee me:

Telne gon to gnee me lo to nadze,

<sup>8</sup>gunndipde to zdoo to,

gunde to zigne been grë pxozgol to, gocntseeb zho lo Dios, zeene sca mban noded zho, no zho grë dan ngan co.

<sup>9</sup>Ga raquiet ganle zeene znu rëb Dios:

Ncuane lëbdraa guic naa been zho,

per dipse len choo iz, blactaa ncuane gon zho ben naa.

<sup>10</sup>Zeene gon naa scataa nac zho,

laa ne gon zho diidz tsie zho nëz ne rlu naa lo zho, lel zhaa ncuane run zho;

nacne nli benngulëë zho guic naa.

<sup>11</sup> Lo guie|blëë co, bdetē naa diidz ndziñ zho zaatne nded naa ndziiladz zho.

<sup>12</sup> Bets, bziān, golguiē sca ganle ib gunndipde to zdoo to, zeēna sozite to lo me ne nac me Dios nguiamban. <sup>13</sup> Gzataa dze, golnee lo grē zha ne nacgrē to (nasraa laga rdeeda diidz), zeēna ni tib tsienald grē ncuāne runctal xtol miech, lozh ga lëēw yquiaaqui gacntseeb to lo Dios. <sup>14</sup> Sac gon, par gdziñ ne zaatne no Jesús, ib none tiblīque gac ne, tibaque gnalo ne Dios zigne bnalo ne me zeēne psilo bdziuunbey ne me. <sup>15</sup> Ni nadzegazh none dzioxcō ne miñ co. Golsoladz ganle zha rnee lo Xtiidz me:

Te|ne gon to gnee me lo to nadze,

gunndipde to zdoo to,

gunde to zigne beē grē zha ne sca gocntseeb lo me ga.

<sup>16</sup> Ni lëē miñ co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me, <sup>17</sup> beēntal zho xtol zho. Dipse len choo iz ne sca bio zho dan co, bieednie me zho. <sup>18</sup> Zeēne gon me rond zho xtiidz me, nacne bnee me lo zho rēb me gdziñd dze ne gdziñ zho zaatne ndeed me ndziiladz zho. <sup>19</sup> Ni nligaaw bdziñd zho, grēse zho gut dan co; sac sca beēndip zho zdoo zho, ib bliladz zho miñe rnee me.

**4** Sca nagon bzhaac grē miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzga ne, none ndzinli gac ne, zeēna ni tib choot sacd zig bzhaac grē zha co. <sup>2</sup> Sac zigne nagon nonee Dios lo ne niina dieñ zha gdziñ ne zaatne gneedz me ga, znuque bnee me lo zho; per zhlëse bin zhow, ib bliladz zhow dib zdoo zho. <sup>3</sup> Sac loxaque zha ne dib zdoose rliladz xtiidz Dios, zha cose zrieelo gdziñ zaatne nacle diidz ga gdeed me gdziiladz zho. Miñcocxe waa, zeēne gon me bliladz zha co xtiidz me, bdeete me diidz ndziñ zho ga.

Niaale zaatne gdziiladz zho ga, nolew zeēne blozh bzaa Dios grētaa ncuāne no. <sup>4</sup> Sac gon rnee lo Xtiidz me: “Xoop ngbidz bzaa me grētaa ncuāne no, laa zeēne gol ngbidz gadz laa me bdziiladz.” <sup>5</sup> Niaalew nagon, sinque ne gocntseeb zho lo me gane bdeete me diidz ndziñ zho.

<sup>6</sup> Grē zha ne glo gocnan xtiidz me ga, brielod ndziñ zho; per zig nac niina, laa me biī quiambëz sëēb grēraa zha ne no sëēb. <sup>7</sup> Gacxe waa, laa me biire pso stib dze ne ygaa zho guie|nzaac co. Lëē miñ co ga znu bzeet David, zeēne rēb me: “Te|ne gon to gnee me lo to nadze, gunndipde to zdoo to.” Ndaldoole iz sca bzhaac grē zhagol co, dzigora znu bzeet David; <sup>8</sup> ga nagon rlu no stib lugar ne gdziiladz miech. Nacdraaw zaatne bdziñnie Josué grē zha ne biaan zeēne blozh gut grē zha ne gocntseeb ga; sac te|ne lëēle lugar co ga, nsodraa Dios stib dze ne ygaa miech guie|nzaac co. <sup>9</sup> Miñ co nagon, ndion ne ible no stib lugar co, ni ga gdziñ grēse zha ne ngab lo Dios. <sup>10</sup> Grēse zha ne gdziñ ga, gasi laa zho gdziiladz lo grētaa xtsiñ zho, zigne bdziiladzaque Dios zeēne blozh bzaa me grētaa ncuāne no.

<sup>11</sup>Gacxe nana sca, gōlgotsaa dzioxcō ne dziuun ne miñe rnabey Dios, zeena gdziñ ne ga; dziuun ne zigne been grē zha wladz ne sca bind xtiidz me. <sup>12</sup>Sac Diosi gon, diidz ne rnee me, nona. Zeene rnee me, rien ne grēse miñe nac ne. Nan me pe no guic ne, pe rza zdoo ne; niicle ncuaañe rzac ne mazdraa ngueetsa, nan mew. <sup>13</sup>Tsod ncuaañe tsongueets lo me. Grēse ncuaañe rac, me rana; ni tib tib ne, lo me cueero ne grēse tel zha mban ne.

### Lëë pxoz nroob ga nac Jesús

<sup>14</sup>Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëë me ga nac Jesús, men ne nac Xpëed Dios, me none gnalo ne; none tiblīque gac ne. <sup>15</sup>Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grētaa mod ne rquiil mendox ne par gunctal ne xtol ne. Bzhaac me zigne rziacaque ne niina, lëëraasi biabd me lo dol. <sup>16</sup>Gacxe nagon waa, ine tibiladz gōlgotsaa gbig ne lo Dios, ndion ne ganle ible squia zdoo me ne, ni ible zacniē me ne zeene rquiinpaa ne gun me xyudar ne, sac ne nligaa noxcō me ne.

**5** <sup>1-3</sup>Ible Jesús nac zhipxoz nroob ne niina. Gotsaa gwi ne ganle, men ne rga rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grē gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni scaquegaa riesan me miñe guiooglo lo xtol me; sac gon, miech guidzliuque nac me. Ye me rzac zigne rzac grēraa miech, gane rien me rquia zdoo me grē zha ne peet riēd, grē zha ne mazdraa ngoopdol.

<sup>4</sup>Ni zha ne sca rac pxoz nroob, led zhald zho rzëeb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. <sup>5</sup>Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.” <sup>6</sup>Ni rëb me:

Luu nac pxoz nroob, gdziñd dze ne gdzëë luu,  
luu gac zig pxoz Melquisedec.

<sup>7</sup>Zeene bii zo Jesús lo guidzliu rii, tib vuilt mban rac me zig zet me lo guielñe, haxta roon me, nguiedz bnee me bnab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me. <sup>8</sup>Niicle ne Xpëed Dios nac me, per tib men nguzobdiidz goc me, maase mincopaa pquiaqui nroob guielñe ne bded me. <sup>9</sup>Ni ne sca bin me diidz been me grēse miñe bnabey Dios me, gacxe waa grēse miech ne gban zigne nac xtiidz me, me gdeed tib guielmban ne gdziñdraa dze lozh lo zho; <sup>10</sup>ni bzo Dios me nac me pxoz nroob niina, zigne gocaque Melquisedec pxoz nroob.

### Gacde to zig cho mëdyeen

<sup>11</sup>Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngan gne naa lo to zha naca.

<sup>12</sup>Lo lal dze ne psilo rnaló to Jesús, haxta none tole cseed miech niina, per na gon le<sub>l</sub> rquiin to dien cho gbiire csilo cseed to stib. Rac mëdyeen to i gon, laa ne gow to ncuane row zha brooble le<sub>l</sub> racladz to tibaque nidz guie to. <sup>13</sup>Sac gon, mëdyeen rie nidz, ni rien<sub>d</sub> win dien pe nac ncuane ntseeb, pegaa nac ncuane wen. <sup>14</sup>Sangue grëloraa guielwagw, min co rquiin grë zha gol, ni zha co niinile zho, rien zho pe nac ncuane wen, pegaa nac ncuane ntseeb.

**6** Gacxe waa, none tsoxco to gac to tib zha gol. Gunde to ne mine pseedsé to glo zeene psilo bnalo to Jesús, lo min co ib grieede to. Laa to pseedle ganle:

zha none csaan to guie<sub>l</sub>ntseeb gbig to lo Dios,

zha none gnalo to Dios,

<sup>2</sup> zha cxobnia to guic stib zho, gnab to lo Dios por zha,

zha nac wrobnis,

zha cueeban Dios grë mengut,

zha gon Dios guielwxtis ne gloozh grëtaa guie<sub>l</sub>ntseeb.

<sup>3</sup>Grële min rii nan to. Laa niina telne zneedz Dios diidz, laa to cseed mine nora gacnan to.

<sup>4</sup>Sac gon, no ncuane grieelod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoo Dios psilaa me zho, bdeed Espiritu Sant guielbiini lo zho, <sup>5</sup>bien zho zha wentaa nac xtiidz me, zha grieelo sëëb zho zaatne ziaadyob gdzin zho (zeene glu Dios grë poder ne rap me), <sup>6</sup>ni lozh ga csaan zhow, tsienal zho guie<sub>l</sub>ntseeb stib; grieelod nose co guic zho gbiire sëëb zho xnëz Dios. Ni zha ne gon sca run, rrieequia noquiaa zho Jesús lo cruz ga stib, gbiire gzhidznie miech me. <sup>7</sup>Zig nac tib lë liu ne rga grëse nisguie ne riab, zeene rrieequia grë ncuane ran zho low, runlay Diosa; <sup>8</sup>laa telne niapse yag guiets, niapse grë guizh guiets roob low, paat rquiinda; ib tedsod zdzibdee Diosa, ni lozh ga znabey me tseca. Scaque nagon nac miech ne runbey Xtiidz me.

<sup>9</sup>Bets, bzian, laa naa rne min rii lo to, per guiabde to togo mine run to rzet naa. Tel to, rien naa briele to lo grë guie<sub>l</sub>ntseeb, lole Dios ngab to niina. <sup>10</sup>Nanle to ganle, Diossi ncuane rieguial tib tib miech, min co rdeed me lo zho. Grëtaa ncuane noyun to niina ne rleynie to me, grë tel zha rquia zdoo to been to xyudar grëraa zha ne no xnëz me, ni noyungaa tow niina; grësew ible guiaanladzd mew. <sup>11</sup>Mine rzoobladz naa, tibaque squi nguieel gac to, zeena scagaa zgaa to grë ncuane nacle diidz gneedz Dios lo to. <sup>12</sup>Sac dzigosi guieete to, ib gbechde to; masaque laa guic to tsienie ycaania to grëtaa mine bneele me gneedz me lo ne; zigne been grë zha ne nlipaa bnalo me.

#### Mine rnee Dios run mew

<sup>13-14</sup>Golsoladz ganle, zeene psan Dios xtiidz me lo Abraham been mew zigne bneese mew. Lëë hor co rëb me laa me gunlay Abraham, ni ndal gon me lo xti Abraham. Ni lëëque lë me bzeet me, par glu ne ible zun me mine bnee

me. <sup>15</sup>Scagaa Abraham, tiblīque bliladz me ne laaw gac; lëe gdib pquiambëz me bdziñ dze co.

<sup>16</sup>Zig nac miech, par glu ne zuñ zho miñe rnee zho, dzigo rzeet zho lë tib men ne mazdraa non lo zho; ni deque sca run zho ga rlu ne gdzëedraa xtiidz zho. <sup>17</sup>Scagaa Dios, laa me bzeet lë me sac guiendraa stib men ne mazdraa non lo me. Ga blu me ne ible zuñ me miñe bnee me ga.

<sup>18</sup>Zeene sca rsan Dios diidz, ni rzeet me lë me, choot grielodraa ctsëe miñe rnee me, ni niicle megaaw nacd me men ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me miñe psan me diidz ygaa ne. <sup>19</sup>Min co nagon, none tiblīque gac ne zig tib barcw ne dziits zob lo nis, sac no ncuane naaza len nis; ndion ne ganle, ible zdziñ ne len yadoo nroob ne zob Jesús. <sup>20</sup>Laa me bner bdziñ me ga nonab me lo Dios por ne. Me nac pxoz nroob niina, ni gdziñdraa dze ne gdzëe me; laa me nac zig goc pxoz Melquisedec.

#### Pxoz nroob ne lë Melquisedec

**7** Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirele Abraham güeyguncxoon me zha ne no grë guiedz ne rlëe lo me, Melquisedec goc pxoz ne güeydzieelo me, beenlay Melquisedec me. <sup>2</sup>Dzigo lo grëse ncuane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, miñ co nac ne rnee zho me “rey ne run guielwxtis”; ni rneeque zho me “rey ne rcuëez lo dil”, sac Salem (guiedz ne goc me rey ga) nac diidz co zig nac ne rnee ne “zaatne guiend dil”. <sup>3</sup>Ib raquiete dien cho goc pxoz me, dien cho goc xniaa me, dien cho gogaa xmengol me; niicle raquietegaa dien zha blanso me lo guidzliu, dien pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdziñ dze gdzëe.

<sup>4</sup>Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuane bla me ga, lo Melquisedec. <sup>5</sup>Nana, telne niac Melquisedec zha xtii Leví guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuane quianie zho run zhow tsii lal rdeed zho tib lala lo zha xtii Leví, sac zha co nac pxoz; ni tibaque dii ne nac zho. <sup>6</sup>Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuane co lo me.

b) Me beenlay Abraham; ni laa Abraham biaanniele diidz pe nac miñe gdeed Dios lo Abraham. <sup>7</sup>Ni ndion ne ganle men nroob nac zha ne runlay.

<sup>8</sup>c) Grë pxoz ne sca rcaania gon co, rdziñ dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

<sup>9</sup>d) Rrieequia ye grë pxoz ne brieequia lo zha xtii Leví ye zho ga bdeed gon lo Melquisedec, zeene sca bdeed Abraham gon co lo me. <sup>10</sup>Sac niicle ne gard gal Leví hor co, per racle Leví cuent ga, sac xpëedaque Abraham goc Leví.

<sup>11</sup>e) Grë pxoz ne briequia lo xtií Leví ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtií Aarón, mazd pxeel me tib pxoz zig pxoz Melquisedec.

<sup>12</sup>Zeeñe sca ptsëe Dios lo dii ne ziaad pxoz, hor co nacne bdzëëque grë xley pxoz. <sup>13-14</sup>Ndion ne ganle, Jesús men ne nac pxoz cub niina, lo xtií Judá briequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. <sup>15</sup>Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec, <sup>16</sup>nacd mew porne ziaad me lo xtií Leví, sinque porne nac me tib men ne gdzind dze lozh xquielmban. <sup>17</sup>Zigne raquetaque me, zaatne rnee:

Luu nac pxoz nroob, gdzind dze ne gdzëe luu,

luu gac zig pxoz Melquisedec.

<sup>18</sup>Gataa laa grë xley pxoz biaan tib lad, sac grëse mine bnabey pxoz hor co run miech, paat pquiinda. <sup>19</sup>Ni lalnu brieelod nsanwena miech lo Dios; sangue niina, mazdraa wen zio ne, sac ndionpaa ne Jesús nac men ne csanwen ne lo Dios, sac me nac men nroob ne rnalo ne.

<sup>20</sup>Dioszhal rëb Jesús gac tib pxoz ne gdzind dze gdzëe, ni haxta bzeet me lë me parne glu ne ctsëed me xtiidz me; <sup>21</sup>laa grëraa pxoz ne ziezo, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdzind dze ne gdzëe luu,

luu gac pxoz nroob zig Melquisedec.

Naa nrew, ni naasi ctsëed naa xtidz naa.

<sup>22</sup>Mincoxe waa ndion ne, diidz ne bianne Dios miech ga gdzind dze ne gdzëew; sac gon, por Jesús laaw noyac. <sup>23</sup>Glo, ndaldoo zha ne goc pxoz, sac grëse zho miech nac zho, rdzind dze ne laa zho ret, zeene laa tib zho ret laa stib zho rzo. <sup>24</sup>Sangue Jesús, led yed me gree par dien cho stib so, sac mesi gdzind dze ne guet me. <sup>25</sup>Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lëe blaale zho ga. Tibaque laa me gnab lo Dios por zha, sac gdzind dze ne guet me.

<sup>26</sup>Jesús nac tib men ne nlipaa mbe, ni tib dol rapd me, ib rdziguiend me guieintseeb; gacxe waa, beennon Dios me, ni lëepaa pxoz nroob co nagon rquin ne. <sup>27</sup>Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csanmbe me zho lo xtol zho; ni rutaque zho ma ne riogon lo Dios parne guiaanmbe grëraa menguedz; sangue Jesús, tibaque vult bdeed me gon co, ni mezhal goc gon co. <sup>28</sup>Stiba, glo, zha ne rgaa rac pxoz nroob zigne rnabey ley, ye zho runctal zho xtol zho; sangue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib men mbe nac me, ni gdzind dze ne gdzëe me.

### Jesúsle nac men ne rteed xtiidz ne

**8** Lo grë mine quiane naa nu, mine racladzpaa naa gacnan to nac min rii: Jesús nac zhipxoz nroob ne, ni zaatne zob Dios, men nroob ne rnabey,



ga zob me. <sup>2</sup>Gbaa no me, ga quiayun me dziin zaatne nacpaa yadoo, Dios bzaa yadoo co, led yedraa min co bzaa miech.

<sup>3</sup>Ndion ne ganle, zha ne rac pxoz nroob, laa zho rzo, zeena grè ma, grègaa ncuane rgogon miech, zha rdeeda lo Dios; scaquegaa Jesús, ye me bdeed me gon lo Dios. <sup>4</sup>Tel niaca mine bii no me lo guidzliu niina, grielod gac me pxoz nroob, sacne nole pxoz nroob ne rdeed grè gon co lo Dios, zigne rnabey ley. <sup>5</sup>Grè dziin ne run grè zha ne rac pxoz nroob lo guidzliu rii, lega nacsew zig zhimplè grè mine rac gbaa; yadoo ne rio zho lo guidzliu riiw, lega nacsew zig zhimplè yadoo ro ne zob gbaa. Golsoladz ganle, zeene laa Moisés gzaa yadoo, rëb Dios lo me: “Zigne gon bluse naa lo luu guic gui ga, sca none gzaa luuw.” <sup>6</sup>Gacxe waa, tel Jesús men ne nac zhipxoz nroob ne niina, mazdraa non dziin ne quiayun me; sac gon, zeene pso Dios me gac me pxoz nroob, psan Dios diidz stib zha grielo yгаа ne grè guieInzaac nroob ne gneedz Dios lo ne, ni me gunctsin ne lo Dios.

<sup>7</sup>Wenraa nac diidz ne psan Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsan me stib xtiidz me. <sup>8</sup>Ni bzeetlegaa me ne laa me csan stib xtiidz me, sac grè zha ne biaannie xtiidz me glo, loxaque beenctal zho xtol zho. Min co ga raquiet lo Xtiidz me, zaatne znu rnee:

Rnee men ndzon ne rnabey: Zdzin dze ne gbiire guiaan no diidz grè no zha Israel, ni zha Judá.

<sup>9</sup>Per gacdraaw zig diidz ne biaan no grè no xmengol zho, zeene rrieequia bzheen naa nia grè zha gol co, blee naa zho lo caxtigw ne noded zho Egipt; sac ni lalnu güeynalđ zho diidz ne biaan no ga, nacne niicle naagaaw, psaanladz naa zho.

<sup>10</sup>Zeene gdzin dze co, znu nac diidz ne guiaan no grè no zha Israel: Grëse xley naa, nis nis gacnan zhow, zig nac zeene haxta len zdoo zho, len guic zho zhobneew. Dzigosi laa zho gunbey naa ne naa nac xDios zho, ni niicle naagaaw, laa naa gunbey zho ne lo naa ngab zho.

<sup>11</sup>Dzigosi yquiindraa tso zho gnee zho lo menlidz zho, lo menladz zho: “None gunbey luu Dios gon.”

Sac len dze co, grëse zho runbeyle zho naa, niicle zha ne mazdraa wina, niicle zha ne mazdragaa nona.

<sup>12</sup>Tel pe nactaa xquieIntseeb zho, zun naa zhow perdon; gdzindraa dze csoladz naa grè falt ne been zho lo naa.

<sup>13</sup>Zeene sca bzeet me ne laa me csan stib xtiidz me, ga rlu ne rquiindraa mine biaan glo ga; sac nac grè ncuuan gox rquiindraaw, laaw nole par nitlow.

### Yadoo ne no gbaa

**9** Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaa yadoo ne gac zaatne tsiegan zho me. <sup>2</sup>Dzigo bzaa zho tib yu mantiad ne goc yadoo co, groltaa len yu co pquiaancaan zho tib lar nroob, goc len yu co chop len. Tib lena, mine riaan nëz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib guietxtil ne naclayle. <sup>3</sup>Laa stib lena, mine riaan nëz zhits lar co, ga nac zaatne Ndadoo; <sup>4</sup>ga rzo tib yag ndiaab niapse or lada, dzigo lo co rec yaal; leen coque zhoob tib guin scaque niapse or ndiaab lada. Len guin co no grop lë quie lag ne pquia ley ne pcaania Moisés, ga no bar ne bzhen Aarón, bar ne bdzib ben ga; leen coque no tib guies win niaa niapse or, len guies co no palal maná, guietxtil ne bguiaan Dios grë mengol co.

Lëe guin co biaan par csoladz zho zha nac diidz ne biaannie Dios zho. <sup>5</sup>Zhits guin co zoli chop anjl ne bzaa zho, masaque rbebel grop anjl co rtsiig me xiil me rtse me zhits guin co, zaatne rliaal xchen grë ma ne riogon lo Dios, par guiooglo lo xtol menguedz. Par gne naa zha nacraa grë ncuuan co, nneedzraaw diidz nu niina.

<sup>6</sup>Sca nagon baa yadoo co, dzigo grë zha ne rac pxoz tibaque rzëëb zho zaatne Nda ga; ga riegun zho dziin ne rnabey ley zho gun zho. <sup>7</sup>Laa stib lena, zaatne Ndadoo ga, loxaque men ne nacse pxoz nroob rrieelo rzëëb ga, ni tibaque vuelt tib len iz rzëëb zho. Zeene rzëëb zho, rienie zho xchen ma ne rgogon zho par guiooglo lo xtol zho, ni guiogloogaa lo grë xtol menguedz, dol ne biend zho been zho. <sup>8</sup>Gase na ganle rlu Espiritu Sant lo ne, gacd sëëb grëraa miech zaatne Ndadoo ga, laga bii sca chop len nac yadoo.

<sup>9</sup>Golgotsoa gwi ne niina na ganle zha naca: Glo, niicle ne scataa riesan zho gon, scataa rut zho ma ne rgogon zho, per brieelod grë ncuuan co nsanmbew zdo zho; <sup>10</sup>sac hor co, laa zho güeynal grë ncuuane laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gancub diidz ne biaannie Dios zho ga.

<sup>11</sup>Sangu ne niina ne laa Jesús baaad, niina ne mele nac pxoz nroob, por me laa miech yгаа grë guielnzaac ne bneele Dios ga. Bdzin dze laa me bzëëb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech), <sup>12</sup>zeene bzëëb me, bzëëbnied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me bzëëbnie me zaatne Ndadoo ga; tibaque vuelt bzëëb me, ni lëe psanmbele me ne lo grëtaa xtol ne ga.

<sup>13</sup>Nana, telne scataa pquiuin zho xchen ngon yeen, xchen chiv yeen, rio zho rzëëg zho tib vac yeen rliaal xquidie co lad zha ne rap falt, par gbiche dol co guiaanmbe zho lo Dios. <sup>14</sup>¿Pe lel xchen Jesús dzigo? Mazdraa gon nac xchen me, ible sanmbew ne lo grëtaa ncuuane paat rquiind ne bdziuun ne glo, niinasi zrieelo dziuun ne mine rnabey Dios nguiamban. Sac gon, tel Jesús ni tib dol

rapd me, ni Espíritu Sant bloo zdoo me bdeed me me goc me tib gon mbe. <sup>15</sup>Gacxe waa, Jesúsle nac meñ ne gdziñnie ne lo Dios, niina ne laa Dios psañ stib xtiidz me. Zeene gut me, ga bdiizh me grëtaa xtol miech, zigtaa zha ne biaannie diidz glo cow, zigtagaa zha ne nobedz me len dze riiw; niinasi grëse zho zrieelo yгаа zho guielmban ne gdziñd dze lozh ga, zigne nacle xtiidz me.

<sup>16</sup>Gotsaa gwi ne ganle, xtiidz miech, mine rсан zho par dien zha gac grë ncuaañe rap zho zeene laa zho guet, laga bii mban zho grielod gacnon diidz co; <sup>17</sup>sinque haxta ret zho, dzigo laa diidz co racnon. <sup>18</sup>Scaque nagon, zeene psañ Dios xtiidz me glo, gutgazh ma ne briece ren bzhiee dzigoraa laa diidz co psilo gocnon.

<sup>19</sup>Golgotsaa csoladz ganle, zeene blozh bnee Moisés lo menguietz zha nac diidz ne psañ Dios ga, laa xchen ngon yeen, xchen chiv yeen ndxiembzle notsa nis; dzigo bzoob me tib lë guits mëcwxiiil rna nizhnie tib guic bar, blozh ga, psëeb mew lo ren co blaal me ren co lo guits ne quia grë diidz co, ni blaal mew lad grëse miech co, <sup>20</sup>ni rëb me lo zho: “Laa ren rii bzhiee, zeena gacnan to desde nadzetaa laa diidz ne psañ Dios lo to nu csilo gacnon, none gun to mine rnabeya.” <sup>21</sup>Blozh ga, blaalaque me ren co gdipse len yadoo, ni blaal mew grëse lad ncuaañe racdziin len yadoo.

<sup>22</sup>Sca nagon nac ley co, grëse ncuaañe no guiaanmbe, ib ren rсанmbew; scaque miech, haxta rzhiee xchen ma ne riogon dzigoraa riooglo lo xtol zho. <sup>23</sup>Mincoxe waa, sca pxiee Moisés xchen ma biaanmbe yadoo co ni grë ncuaañe racdziin lena (nacse yadoo co zig zhimlë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëe ren co goc xchen Jesús.

<sup>24</sup>Zeene bzëeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlë mine no gbaa. <sup>25</sup>Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vuilt güeylogon me me.

<sup>26</sup>Teñe ye me niun zig run grëraa pxoz co, pe zhistaale vuilt na ziyet me wlal ne bre guidzliu, jper na, led yed me! Zeene laa dze bdziñ, laa me biaad, xchenpaa me bzhiee, ni tibaque vuilt bzhiew psanmbew ne lo dol grëse ne ne nac ne miech. <sup>27</sup>Zigne biaan tibaque vuilt ret miech, lozh ga zeene laa Dios gun guielwxtis, laa zho none gacredz lo me; <sup>28</sup>scaquegaa tibaque vuilt gut Jesús bdiizh me xtol grëse miech; ni dzziñ ne guiaad me stib, per guiaatraa me par biire quizh me xtol miech, sinque laa me guiaadsilaa grë zha ne quiambézlo me, zeena gand zho grëtaa guielñe ne csiaab Dios.

### Tibaque vuilt goc Jesús gon

**10** Grë mine rnabey ley run pxoz, lega nacsew zig tib zhimlë grëtaa mine been Jesús por ne. Hor co niicle gzobse iz rienie grë miech co gon zigne rnabey ley, per brieeloda nsanmbew zho lo dol. <sup>2</sup>Teñiaca mine gon cose nsanmbe zho, dzigo tibtaa vuilt ne niesañ zhow lëe niaanmbele zho ga; niicle zhagaaw, niennpaa zho ne laa zho mbele. <sup>3</sup>Per na, gzobse iz zeene

laa zho riesan gon co rsoladz zho ne bii no zho lo dol, <sup>4</sup>sac gon, grieelod ne xchense ngon yeen, xchense chiv yeen guiaanmbe miech lo dol.

<sup>5</sup>Minococxe waa, zeene laa Jesús biaad lo guidzliu, pe led znu rëb me lo Dios:

Grë xchen ma, grë ncuane riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

<sup>6</sup>Grë ncuane rzëëg zho, grë ren ne rxiee zho, par guiaanmbe zho lo dol; racladzdraa luu gan luuw.

<sup>7</sup>Gane niina, laa naa zial nu Dios, zeena gun naa mine gnabeytaa luu; zigne zhobneelee lo Xtiidz luu gac naa.

<sup>8</sup>Gotsaa gwi ne ganle, blozhse rëb me racladzdraa Dios tso zho pe ncuane tsielogon zho lo me, tso zho cxiee zho xchen ma, gzëëg zho ma par guiaanmbe zho (niicle ne lo ley sca rnabey gun zho); <sup>9</sup>dzigo rëb me: “Dios, laa naa zial nu zeena gun naa mine gnabeytaa luu.” Gase nagon rlu ptiche me diidz ne psan Dios ga glo, laa stib diidz cub ne biaanmie Dios miech ga psilo noquiiin.

<sup>10</sup>Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo dol. Tibaque vuelte sca goc me gon co, ni lëë psanmbele me ne ga.

<sup>11</sup>Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieloda nsanmbew miech lo dol; <sup>12</sup>sangue Jesús gon, tibaque vuelte bzhiee xchen me goc me gon psanmbe me miech lo dol. Laa niina, cue Dios nëz derech ga zob me, <sup>13</sup>quiambëz me gdziin dze zeene grëse zha ne rlëë ran me, laa zho guiaanwin lo me. <sup>14</sup>Tibaque gon ne bdeed me ga, psanmbegazh me grëse zha ne nodziinnie me lo Dios.

<sup>15-16</sup>Ni nligaa scaw, haxta Espiritu Sant, zeene blozh bzeet me zha rëb Dios guiaanmie me zha Israel diidz stib, zha nis nis gacnan zho xley Dios, zig nac zeene haxta len zdoo zho, haxta len guic zho zhobneew; <sup>17</sup>dzigo bzeet me zeene znu rëb Dios: “Tel pe nactaa xquielntseeb zho, tel pe nactaa xtol zho, gdziindraa dze ne csoladz naaw.”

<sup>18</sup>Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csanmbe me ne.

### None gbig ne lo Dios

<sup>19</sup>Bets, bzian, glo loxaque men ne nacle pxoz nroob rzëëb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziin ne, sac xquizh xquielnzaac Jesús, bdeed me me bzhiee xchen me psanmbe me ne. <sup>20</sup>Zeene sca gut Jesús, rriequia tib nëz cub ga pxal me par gdziin ne zaatne ygaa ne guielmban; lëë nëz co ga bzial zeene sca briez lar ne quia len yadoo ga. <sup>21</sup>Ni ne me nac zhipxoz nroob ne no me yadoo gbaa, <sup>22</sup>niinasi zacle gdziin ne haxta lo Dios.

Nana sca, dib zdoo ne golgotsaa gbig ne lo Dios, dib zdoo ne golgotsaa gnalo ne me, benque laa me psanmbele ne lo grëtaa ncuane yozh ne rza zdoo ne, rza guic ne; rriequia bgaz me ne tib nis mbe. <sup>23</sup>Tiblique golgotsaa gac ne,

benque ndion ne ganle ible zdin dze ne gac mine riladz ne; sac Dios psan diidz co, ni ndion ne rquidied me.

<sup>24</sup> Golgotsaa dzioxc ne cseedlsa ne gleynie ne zha ne nacgrë ne, ni dziuun ne ncuane yquini lo ne grë ne. <sup>25</sup> Dze ne nacle diidz ycaalsa ne dzioolnie ne Dios, ible none ycaalsa ne grëse ne, guionald ne mine run grë zha ne rzozit. None cso ne diidz lo grë zha ne nacgrë ne, conley ne zdoo zho dziits so zho lo mine riladz ne; xco co none dzio ne niina ne laa dze ne guiaad Jesús ziaadgaxle.

<sup>26</sup> Zha ne beenbeyle zha nac diidzli, ni lozh ga xtsiinpaagunctal zho xtol zho, tsodraa gon ne csanmbe zho lo dol co; <sup>27</sup> lëëtaa mine tsieguial zho nac guielnë dox ne yгаа zho zeene laa Dios gun guielwxtis; dze co laa me cxeel zho lo gui dox, zaatne nitlo grëraa zha ntseeb ne gocndaan lo me.

<sup>28</sup> Gotsaa gwi ne ganle, niicxe ley ne na pcaania Moisés padzeela ga, zha ne rguiits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho. <sup>29</sup> Nana, ¿pe lelgue zha ne dzigo quiits mine rnabey Jesús? Mazdraa gon nac guielnë ne yгаа zho, sac noguitnie zho xchen Jesús ga, rzhidznie zho Espíritu Sant ga sca gun zho.

Noguitnie zho ren co, ni lëëw bzhiee biaanmbe zho lo dol, lëëw bzhiee zeene psan Dios stib xtiidz me zha gbig miech lo me; rzhidznie zho Espíritu Sant, ni men co no zhixco zho.

<sup>30</sup> Zha ne sca gun, ible nroob guielnë ne yгаа zho; sac ndion ne ganle zha nac xDios ne, me znu rnee: “Naa raguial gun guielwxtis; naa gded mine riegual tib tib miech.” Ni zhobneeque lo Xtiidz me: “Grëse miech, lo me cueero zho grë ncuane been zho.” <sup>31</sup> ¡Ne nligaa ncuane gdzieb ne ted grë zha ntseeb ne sca guiab lадznia Dios, men nguiamban!

<sup>32</sup> Sangue to, golsoladz ganle zha bded to zeene griinpaapsilo bnalo to Jesús, niicle ne scataa nroob guielnë ne gon to, per beenctalde to xtol to.

<sup>33</sup> Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to. <sup>34</sup> Grë zha ne biab ladzguuib, mbanse rac zdoo to ran to zha rac zho; niicle zeene biaad zha ne biaadla grë ncuane nacchen to, psaan to ptiche zhow, peet güeyniedaque guic to; sac nanle to mazdraa nac guielnzaac ne yгаа to gbaa, ni mincosi gdzind dze ne nitlow. <sup>35</sup> Nana sca, scaque dziits golso; sac telne tibaque gnalo to Dios, ible zгаа to guielnzaac ne gneedz me. <sup>36</sup> Ible guiaand zdoo to, tibaque dziits golso golgun mine rnabey me; zeena yгаа to grë ncuane bneele me gneedz me lo to. <sup>37</sup> Golsoladz ganle, znu zhobnee lo Xtiidz me:

Ible ile ziaad men ne nacle diidz guiaad ga, led nroobdraaw, laa me glansole.

<sup>38</sup> Grë zha ne zianl mine nac diidzli, ible zban zho sac rnalo zho naa; laa telne guiaan zdoo zho sozit zho lo naa, ni lalnu gleynied naa zho.

<sup>39</sup> Sangue ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zгаа ne tib guielmban ne gdzind dze lozh, sacne znu dib zdoo ne rnalo ne me.

### Zhapaa nac ne dib zdoo ne gnalo ne Dios

**11** Znu nac ne dib zdoo ne gnalo ne Dios. Zha ne dib zdoo rnalo Dios, tiblīque zienie guic zho ne ible zgaa zho miñe quiambëz zho gdeed me lo zho; niicle ncuaañe gard gan̄ zhow, per rzac zho zig nac zeene ran̄le zhow.

<sup>2</sup>Zig nac grë xmen̄gol ne, ne scacxe waa bnalo zho Dios gane bleynie me zho.

<sup>3</sup>Scagaa niina, ne dib zdoo ne rnalo ne Dios, gane rililadz ne me bzaa guidzliu ni grëragaa ncuaañe no, zeene bnabey me biaaw, niicle ne peet guiñd hor co.

<sup>4</sup>Gotsaa gwi ne gan̄le lëë bla zhagol ne dib zdoo bnalo Dios nu:

Zig nac Abel, ne dib zdoo me bnalo me Dios, gane bleynie Dios gon ne bdeed me, lëdle gon ne bdeed bets me Cañ. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet gan̄le pa lotaa dib zdoo me bnalo me Dios.

<sup>5</sup>Scaque Enoc, ne dib zdoo me bnalo me Dios, gane gute me, zomban me zeynie Dios me gbaa, choot gon̄draa me. Zeene bii zomban me lo guidzliu, blu Dios ne rdziladz Dios zha mban me. <sup>6</sup>Sac zha ne rnalod Dios dib zdoo, grielod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

<sup>7</sup>Zig nac Noé, ne dib zdoo me bnalo me Dios, gane bliladz me xtiidz Dios zeene rëb Dios lo me pe nac ncuaañe ziaadyob gac; bin me diidz bzaa me tib barcw nroob, ni len̄ barcw co bio me gza xpëed me ni tsieel me, blaa zho lo guiññe co. Ni ne sca bnalo me Dios, gane ible zgaa me grë miñe gdeed Dios lo grë zha ne biaan̄mbele lo Dios; laa grë zha ntseeb co, ib bnalod zho Dios, gane sca bnitlo zho.

<sup>8</sup>Zig nac Abraham, ne dib zdoo me bnalo me Dios, gane zeene bredz Dios me ycaania me zaatne gdeed Dios lo me, binga me diidz briece me zie me, niicle ne nan̄d me zha nac dan co. <sup>9</sup>Ni ne sca rnalo me Dios, gane niicle bdziñ me lo liu co, laa me wbanse ga zig tib men̄ zit. Lega nacse len̄ grë yu mantiad bio me grop me Isaac, scaquegaa Jacob; sac ye grop zha co biaan̄ diidz nacchen liu co. <sup>10</sup>Scase bio Abraham ga, sac nan̄paa me no tib guiedz ndzon ne bzaa Dios, ni ga nac zaatne gdeed Dios gdziñ me.

<sup>11</sup>Scaque Sar, wnaa ne goc tsieel Abraham, ne dib zdoo me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoo me bliladz me ible zun̄ Dios miñe bnee me ga. <sup>12</sup>Ye Abraham, men̄gol-le me, men̄ ne yquianiedraa mëed nac me, ni zeene laa Sar gop mëed co, miech guizhiu ne briequia lo dii co; pale mel ne ndziib gbaa, yuzh ne ndxieгаа ro nisdoo.

<sup>13</sup>Gza zha ne blozh goquiet nu, gardaque ygaa zho grë miñe bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnalo zho me gane bliladz zho ne ible zgaa zhow, rzac zho zig nac zeene ran̄le zhow. Bien̄ zho ne tib ziaadtedse zho lo guidzliu rii, nacse zho zig tib men̄

zit. <sup>14</sup>Ni ne sca bien zho tib ziaadtedse zho lo guidzliu rii, ga rlu ne dzigoraa gdziñ zho zaatne gacpaa ladz zho. <sup>15</sup>Sac telne niend zho ne scaw, znuse mbire zho ney zho zaatne briece zho ga. <sup>16</sup>Tibaque laa guic zho güeynie ne ib zdziñ zho zaatne gacpaa ladz zho gbaa; gacxe waa, rtoladzd Dios ne nac me Dios ne riladz zho, laa me bzhixcuaale guiedz ne gac ladz zho ga.

<sup>17</sup>Zeene been Dios Abraham prueb dien pe nli rnalo Abraham me, rëb me cogon Abraham xpëed Abraham Isaac; ne dib zdoo Abraham rnalo me Dios gane niicle tibaque mëed ga lo me, per bleeladz me mëed co, laa me niutle win niac win gon. <sup>18</sup>¶Ni laa xtiidz Dios nac ne win gunctal lo xtii me! <sup>19</sup>Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni biire brieeban win stib.

<sup>20</sup>Niiclegaa Isaac, ne dib zdoo me bnalo me Dios, gane zeene bnab me gunlay Dios grop xpëed me, Jacob ni Esaú, bzeet me zha gac lo xquielmban zho.

<sup>21</sup>Scaque Jacob, ne dib zdoo me bnalo me Dios, gane niicle laa me nole guet me bnab me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

<sup>22</sup>Scaque José, ne dib zdoo me bnalo me Dios, gane zeene laa me merle guet bzeet me ne ib zdziñ dze griece zha Israel Egipt; haxta psan me diidz güey zho xtsit me zeene laa zho griece ga.

<sup>23</sup>Zig nac pxoz Moisés, xniaa Moisés, ne dib zdoo me bnalo me Dios, gane boolan me mëed niow yeen co lidz me tson mëe; ib bdziebd me mine bnabey rey Egipt.

<sup>24</sup>Niiclegaa Moisés, ne dib zdoo me bnalo me Dios, gane zeene laa me broob bdeetraa me diidz niunbey zho me zig xpëedmiag rey; <sup>25</sup>laa ne niaan me lidz rey nleynie me grë ncuane niunctal xtol me, mazd bleeladz me me psacsi zho me grë menladz me. <sup>26</sup>Bien me ne nonguielraaw ted me guielnë zig pteed zho Jesús, lëdle niaannie me grë ncuane non ne no Egipt; sacne mine mazdraa nonie guic me nac guielnzaac ne gdeed Dios lo me.

<sup>27</sup>Ne sca rnalo me Dios, gane bdziebd me xquieldox rey, tiblque been me guic me briece me Egipt; sac nanpaa me niicle rand me Dios, per Dios nacie me. <sup>28</sup>Ne scaque rnalo me Dios, gane bnabey me been zha Israel lni Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

<sup>29</sup>Grë zha Israel co, ne dib zdoo zho bnalo zho Dios gane wbiig lo Nisdoo Nizhnie, bzhial tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdoo co stib, grëse zho gut. <sup>30</sup>Ne scaque dib zdoo zho bnalo zho Dios, gane bliaa| biedz nroob ne ndze igo guiedz Jericó, zeene bza gadz ngbidz noyecw zho igo biedz co.

<sup>31</sup>Zig nac Rahab, wnaa ro nëz ne bio guiedz Jericó, ne dib zdoo me bnalo me Dios, gane peet gocd me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole pxeel zha Israel güey wlets ga.

<sup>32</sup>Ni noragaa zha ne sca dib zdoo bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac

Samuel, ni grêragaa zha ne biadteed xtiidz Dios lo miech. <sup>33</sup>Ne sca dib zdoos zho bnalo zho Dios, no zho beenchen grê guiedz nroob, no zho bnabey grê guiedz zigne nonguiela, no zho gonlo grê mine bzeet Dios gdeed me lo zho, no zho role meedz bdedlaa zho; <sup>34</sup>no zho lo bel dox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablolle lo dil ni biire pcaa zho fuerz stib, haxta benxoon zho zha zit ne nodilnie zho. <sup>35</sup>Grê men wnaa, no zho gonlo brieaban menlidz zho.

Nzian grê zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieaban. <sup>36</sup>Nogaa zho bgaa beennguzee miech zho, bdiin zho zho, bzoob zho zho lo caden, ni bloo zho zho ladzguiib; <sup>37</sup>no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nêzrii nêzrec zie zho, mbanse rac zho guieud pe gow zho, guieud xab zho, tib lèse guid mēcwxiil, tib lèse guid chiv nriēl zho. <sup>38</sup>Miech wen nac zho, ni rieguiald grê miech guidzliu rii guiaadban zha co lo zho, per scataa bded zho. Niapse grê dan bidz, grê dan gui, bio zho; zaatne blēz zho grê len blē, zaatne blēz zho grê len blee.

<sup>39</sup>Ni golgacnan ganle, niicle nli bianzuiuu zho lo Dios ne sca dib zdoos zho bnalo zho me, per gardaque yгаа zho guielnzaac ne psan me diidz ga yгаа zho; <sup>40</sup>sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac min co nac mine mazdraa nroob.

### Choot gbiched lo Jesús

**12** Nziandox grê zha ne sca dib zdoos bnalo Dios. Ni niina, grêse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grê ncuaane runctal xtol ne, zeena ycadraaw parne grielo tibilique dzio ne nêz gdziin ne zaatne no gdziin ne. <sup>2</sup>Tibaque golgotsaa guionie guic ne laa ne gdziin lo Jesús ga, men ne zo lo ne grêse ne ne rnalo ne Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuaane mbeeguielto ga zeene sca quia me lo cruz, per ptoladzd me.

Ni nligaa, zig nac niina cue Dios nêz derech ga zob me bgaa.

<sup>3</sup>Golguien sca, zeene racmban zdoos to, zeene racladz guiaan zdoos to, ib gdeete to diidz; golsoladz ganle, zha pxecw Jesús bded me grêtaa mine pteed grê miech ngoopdol co me. <sup>4</sup>Parga nli, nê noded to noxco to gunctalde to xtol to, per gard guiab ne yгаа to ne gut miech to. <sup>5</sup>Golsoladz ganle zha rnee Dios lo grê zha ne nac xpêed me. Znu raquiet lo Xtiidz me, zaatne rnee:

Xin, zeene rso Dios diidz lo luu gundraa luu grê ncuaane nonguield,  
none sac zdoos luuw;

niicle zeene gactoxгаа me lo luu, gacmband luu.

<sup>6</sup>Sac gon zha ne sca rso me diidz lo, ga rlu ne rleynie me zho;



zha ne ractoxгаа me lo, ga rlu ne nli xpëed me nac zho.

<sup>7</sup>Golguien sca, gacbande to tel pe caxtigw ne cteed Dios to. Golgan ganle, niicxe miech na, ractox zho lo xpëed zho zeene rond win diidz. <sup>8</sup>Nana, tel ib peet glisquidгаа me lo to, gase dzigo rlu ne led xpëete me nac to; sac gon, zha ne nac xpëed me, rlisqui me zeene rond zho xtiidz me. <sup>9</sup>Golsoladz ganle, zeene rac ne mëedlas rlisqui pxoz ne zeene rdziuun ne ncuane nonguield; scagaa ne, rien ne ne me rnabey lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena yгаа ne guielmban.

<sup>10</sup>Gotsaa gwi ne ganle, zig nac pxoz ne, rquia me rlisqui me zeene rdziuun ne ncuane nonguield, sac racladz me zaacse gban ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdoo, zig me; ni lëe min co nonraa. <sup>11</sup>Parga nli, tsod zha ne gley zeene noded zho caxtigw, sinque në rzac zhow; per zeene rded ga, zha ne rienpaa rquiina haxta wen riaan zdoo zho, sac rseed zho zaacse rban zho.

### Nodne gbiche miech lo Dios

<sup>12</sup>Nana sca, telne bdzagle to, golgun ndip nia to, golgun ndip ni to stib, <sup>13</sup>zaacse golsë, tib nëz goltso zeena gziaabnëzde to; dzigo scagaa zrieelo gacnie to zha ne lega noyobe.

<sup>14</sup>Goltsoxco niowse golbannie samiech to, ib gunctalde to xtol to; sac zha ne mbed zdoo, grielod gdzin zho lo Dios. <sup>15</sup>Tibaque golteedlolsa zha ne nacgrë to, golguien ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa mine nac zho rzhooobnen, nzian zdoo zha ne rsan zho, rlozh ga grëse zha co runctal xtol. <sup>16</sup>Ib gunde to grë ncuane tsod zdoo Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mëedglo; <sup>17</sup>ni nanwen to ganle, zeene laa me gocladz nab pxoz me niunlay Dios me zig mëedglo, brielodraaw. Dzigoraa rquia zdoo me, haxta roon me rnab me yгаа me guielnzaac co stib, per pe xtsiinraaw.

<sup>18</sup>¿Golguien sca ganle, nroob nac guielnzaac ne bneedz Dios lo to niina! Led yede to ndzin pa tib cho gui, zig bdzin xmengol to cho Gui Sinaí padzeela. Grë xmengol to, zeene ndxie zho zhan Gui Sinaí, bel dox ne gon zho rso guic gui co, ni goc tib ncow, lala rio bi ratsie nguzi ni rree me; <sup>19</sup>ni lala nguiedz rcuedz trompet, ni nguiedz zëeb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnaab zho lo me gneedraa me. <sup>20</sup>Bdzieb zho bin zho rëb me, zha ne tsep cho gui co none gdeedquie zho zho, gliz lanzгаа zho zho haxta guet zho; scaque grë ma. <sup>21</sup>Ncuane gdziebdoo ne gon zho ga; haxta Moisés rzhidz lo dzeb co.

<sup>22</sup>Sangue to, rrieequia haxta Jerusalén, zaatne no Dios nguiamban gbaa bdzin to, zaatne ndxie grë anjl guizhiu ne roolnie Dios; <sup>23</sup>zaatne ndxie grë zha ne glopaa bzëeb xnëz me, grë zha ne zhooble lë bgaa ga. Laa to bdzinle lo Dios, men ne run guielwxtis; zaatne ndxie grë zha ne psanmbe Dios biaan zho zig tib zha ne peet xtold. <sup>24</sup>Laa to bdzinle lo Jesús, men ne rdzinne miech

lo Dios niina ne laa Dios psan stib xtiidz me; laa to bdziñle zaatne rreequia bliiaal xchen Jesús len yadoo gbaa, lëë ren co mazdraa non lëdle xchen Abel.

<sup>25</sup>Min co nagon, golguien golgun mine rnabey Dios to. Golsoladz ganle, zha bñitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe lel na dzigo ne mezhal quianee lo ne? Ib diedlaad ne gon telne dziond ne mine rnabey me. <sup>26</sup>Zeeñe bnee me lo grë zhagol co, haxta beencxidz me guidzliu, ni rnee me: “Zbire naa guncxidz naa guidzliu stib, haxta ye gbaa guncxidz naa.”

<sup>27</sup>Gase na ganle rlu, lo grëse ncuaañe bzaa me zdziñ ne laa me csiniw, dzigo laaw nitlo; lozh ga, guiaan mine gdzindraa dze nitlo; <sup>28</sup>ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me. <sup>29</sup>Golguien ganle, tel me ne nac me Dios ne rliladz ne, nac me zig nac tib bel dox ne peet rdedlaad lo.

### Golban zigne racladz Dios

**13** Bets, bzian, golleynie grë zha ne nacgrë to, golguien ganle tibaque men ne nac Pxoaz to. <sup>2</sup>Goldeed zaatne cuëz grë men zit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanjl Dios blëz lidz zho. <sup>3</sup>Goltsiegan grë zha ne nioogyu ladzguiib, goltso xliaadz zho zig nac zeene ye to nogrë zho ga. Golgacnie grë zha ne nosacsi miech, nanle to ganle zha rzac ne zeene no ne tib lo guielñë.

<sup>4</sup>To ne nac to zha ne ptsieelniale, sacde to guieltsieel zig beelze pe wguit, ib yquidiede to tsieel to; sac zha ne yquiangob tib zha ne nonguield tsonie zho o yquiangobgaa zho tib zha ne nole tsieel, ib tedsod zunquizh Dios zho dol co.

<sup>5</sup>Tsienalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: “Tibaque gacnie naa to, ib csaand naa to.” <sup>6</sup>Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacnie naa, ¿pe nac nadien gdzieeb naa?

¿Peet grieelod gun miech naa!

<sup>7</sup>Golsoladz zha goc men ne bzo lo to pseed to Xtiidz Dios, ni dib zdoo to golnalo Dios zigne bnalo me Dios.

<sup>8</sup>Golguien ganle, gdzind dze ne gdzëë Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa. <sup>9</sup>Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús.

Diosse nac men ne lozh gzodziits ne lo mine rliladz ne; nacda por tsienal dien pe gow to, pegaa gowde to; sac zha ne zienal min co, paat yquiinda lo zho. <sup>10</sup>Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rreequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal mine rnabey ley, grieelod yquiin zho gon co.

<sup>11</sup> Glo, zeene ret ma ne riogon lo Dios, rlozhse rielaa| pxoz nroob xchen ma zaatne Ndadoo parne guiooglo lo xtol| menguietz, dzigo rienie zho xcuerp ma ro guiedz, ga rzëëg zhow. <sup>12</sup> Scaque Jesús, zeene bzhiee xchen me psan| mbe me miech lo dol|; ro guiedz ga güeysacsi zho me gut me. <sup>13</sup> Scagaa ne niina, gol|gotsaa griece ne lo grë ncuaa|ne lo guidzliu rii, gol|gotsaa cueeladz ne ne guiona| ne zhits Jesús dzian| ne grë guiel|në, tel|ne no dzian| new. <sup>14</sup> Ben|que ndion| ne gan|le, nacd lo guidzliu rii zaatne gbiaazpaa ne, sinque laa ne ziona|l yгаа ne zaatne naraa gneedz Dios gbiaaz ne.

<sup>15</sup> Laa ne ndion|le gan|le, Jesús nac men| ne gun|ctsin| ne lo Dios; gacxe waa, gol|gotsaa gleynie ne Dios, gol|gotsaa gdeed ne xquizh lo me. Lëë min| co gac zig tib gon ne gdeed ne lo me. <sup>16</sup> Golt|soxco gol|gun| grë ncuaa|ne yquii| lo samiech to, ncuaa|ne rgaa lo to, gol|deed palala lo grë zha ne guien|d pe yquii|; sac rrie|equia lëë stib gon ga gdeed to lo Dios, ni min|cogaa rley|nie me.

<sup>17</sup> Gol|gon xtiidz zha ne zo lo to noseed to Xtiidz Dios, gol|guien| zha rnabey lo to, sac gon| zha quianap to ni zha gdeed cuent lo Dios zha pquianap zho to. None gon to xtiidz zho, zeena| ine gley zho yquiaanap zho to; sac gon|, tel|ne lel| nogoguel|në to zho, lëda ga gun| to.

<sup>18</sup> Gol|nab lo Dios gacnien| me no tibaque znu dzioxco no dziuun| no min|e racladz me, me nan| gan|le mbe zdoo no, mbe xquiel|rien no. <sup>19</sup> Ni mine rsopaa naa diidz lo to, golsoladz gol|nab lo Dios gneedz me diidz gbiire guia|niob naa i, guia|gan| naa to.

<sup>20</sup> Jesús nac men| ne quianappaa ne, zig rquianap baxtor xpëcwxiil zho; me gut bzhiee xchen me zeene psan| Dios diidz stib zha gdzi|n miech lo me; ni diidz cosi gdzi|ndraa dze ne gdzëëw.

Dios men| ne bleeban Jesús, men| ne racnien| miech peet zhgab rtsebd zho, <sup>21</sup> me gneedz guiel|biini lo to grieelo to gun| to min|e rnabey me. Jesús sca gol|nalo, zeena| grieelo gban to zigne rdziladz Dios. Dios nac men| ne rieguia|l dziuun|non ne, zigtaa niinaw, zigtagaa grëraa len| izdoo ne guiaada. Scaw nagon|.

<sup>22</sup> Bets, bzian, laa naa rnab lo to ib glëëd guic to, gol|caania palalse diidz ne pso naa lo to nu.

<sup>23</sup> Racladz naa gacnan| to gan|le, laa bets ne Timoté brie|eele ladzguuib; tel|ne zlanson|niob me lo naa nu, grop no me guiaad lo to i.

<sup>24</sup> Gols|guiel| gol|deed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxee|l zhibdiuzh zho lo to.

<sup>25</sup> Guiaann|ie Dios to sca. Me glu gan|le pa lotaa noxco me to.